



## dr säima

**Text: Hans Jürg Zingg**

**Melodie: Hans Jürg Zingg**

**Begleitimprovisation: Edwin Peter**

lue dert der säima uf em acher äne  
ischs nid ärdeschön win är so rüejig louft u säit  
gsehsch plötzlech vor der autvertrouti biuder  
dänksch a van gogh d sunntigschueu u ds drittklassläsibuech  
und da packt di gly e lysi nostalgie  
du dänksch däm ma mues ds handwärch irgendwie no heilig sy

lue dert der säima lue ne chlei vo neecher  
sygerette sunnebrüue bart u längi haar  
violettbruune chittu violettbruuni hose  
u nid wyt drvo chunnt no ne zwöite so drhär  
da plötzlech merksch aha u gsehsch höch hingedra  
aus schtummi wach dr torbärg mit de gitterfänschter schtah

lue dert der säima uf em acher äne  
nei sisch nid dr säima us em drittklassläsibuech  
dä ma wo hie zur schtraf säit weiss dass da dä saame  
der einzig isch won är – aus ma – no säie tarf für lang

un är weiss o no mängs anders:  
zum byspiu dass jede wo zerschtmau da vrbyfahrt dänkt:  
*ou lue mau dasch itz e so eine!*  
u vrbyfahrt  
oder dass nid jede wo vrbyfahrt weiss  
mit was ers vrdienet het dass er cha vrbyfahre  
u vrbyfahrt  
oder o dass mäenge wo vrbyfahrt e kei ahnig het  
vo däm bschissne läbe vom ne zuchthüsler  
u vrbyfahrt

u vor auem dass für di meischte wo vrbyfahre e torbärger  
sys läbe lang es rots tuech blybt  
u resozialisierig es frömdwort wo nume d soziologen im muu füere  
u das sy einewäg aus linggi brüeder

und da packt di chly beduuren u melancholie  
du dänksch: *dä arm siech nei dä wett i würklech de nid sy*

lue dert der säima uf em acher äne  
fahrsch vrby vrgissisch ds biud scho nach em nächschte rank  
är aber dräjt sech jahrelang ir glyche  
müli u dä schtumpfsinn macht ne fertig macht ne chrank

gäu o du weisch bscheid gäu o dir tuets leid  
we d saat vo so re schtraf mau schpeter schlächti chörner treit

- aber äbe

(1975)

Erstveröffentlichung : LP *Improvisatiren* (1979)